

FRANTZIA. Hego-ekialdea astindu duen ekaitzak milaka laguni erasan, eta etxebizitzak eta errepideak hondatu ditu

12 lagun hil eta 4 galdu dira, uholde eta ekaitzaren ondorioz

Gardeko departamendua da hondatuena, Vaucluse eta Heraultekin batera

Erredakzioa | **DONOSTIA**

Gutxienez hamabi lagun hil dira eta beste lau galdu igandean geroztik, Frantziako hego-ekialdeko ekaitz eta uholde handien eraginez. Lurralde hondatuena Gardeko departamendua da, baina inguruko departamenduetan ere ondorio larriak jasaten ari dira, batez ere Vauclusen eta Heraulten.

Hamabi hildakoetatik hamar Garden izan dira. Lau lagun desagertuta, milaka lagun ebakututa, 40.000 etxe elektrizitate gabe, zubiak erorita, errepide gehienak moztuta eta erabat isolatuta herri ugari.

Departamendu hori alerta gorrian zegoen atzo. Errepide Informazioarako Lurralde Zentroak Gardeko departamenduan ez ibiltzea ere aholkatu zuen.

Orsec izeneko larrialdi plan berezia jarri zuten martxan sorrospen zerbitzuak indartzeko. Plan horren baitan, Bouches-

du-Rhone, Var, Ardeche eta itsas Alpeetako suhiltzaileek parte hartu zuten salbamendu lanetan. Geroago, urpekari talde bat bertaratu zen. Armadako ehunka tropa ere bidali zituzten salbamendu zerbitzuei laguntzeko.

Salbamendu lanetan zebilen suhiltzaile bat hil da

Garden ez ezik, Heraulten ere bonbero bat hil zen, urak eramandako auto baten barnean zeuden bi lagun laguntzen saiatzean jasadako zaurien ondorioz. Herri horretan, beren etxetako teilatueta igota zeuden zenbait biztanle ere jaso zituzten larrialdi zerbitzuek.

Vauclusen, berriz, 15.000 etxe telefonorik gabe geratu ziren. Herrialde horretan hiri kaltetuenak Orange eta Avignon izan dira.

Orangen beste pertsona bat hil zen. Hiri horretako kaleetan ura metro erdiko altueraraino iristen zen. Suhiltzaileek zaha-



GERARD JULIEN / EPA

Gard eskualdeko Marguerite hirian gizon bat autotik irteten, uholdeek bete-betean harrapatu ondoren.

LARRIALDI PLANA

Larrialdi plan berezia jarri dute martxan, eta hainbat departamendutako suhiltzaile eta militarrek parte hartu dute

rreren egoitza bat ere hustu behar izan zuten. Zazpi autobide, berriz, moztuta zeuden Orange inguruan; beste hainbat errepide bezala.

Trenen zirkulazioa ere ozto-

patu zuen. Abiadura Handiko Trenaren nahiz tren arruntaren zirkulazioa moztu zuten Avignon eta Nimes hirien artean, Frantziako Trenbideen Elkarteko Nazionalak jakinarazitakoaren arabera.

Valence, Marseila eta Montpellier artean ere, Abiadura Handiko Trena geldituta egon zen ordu batzuek, trenbidean erorita zegoen zuhaitz baten gainetik.

Distantzia luzeko trenek bost orduko atzerapenak izan zituzten. Frantzia hego-ekialdera egin beharreko bidaiak atzera-

TRENAK GELDITUTA

Zenbait gunetan Abiadura Handiko Trena moztu, eta distantzia luzeko bidaietan atzerapen handiak izan ziren

tzeko eskatu zuen Trenbideen Elkartek.

Nicolas Sarkozy Barne ministroa atzo Gardera joan zen, uholdeek eragindako kalteak bertatik bertara ikusteko.

AUSTRIA. Koalizio gobernuko lau kidek kargua utzi ostean hartu du legebiltzarra desegiteko erabakia Wolfgang Schuesslelek

Liberalen barne krisiak eraginda, kantzilerrak hauteskundeak aurreratuko dituela esan du

Erredakzioa | **DONOSTIA**

Austriako kantzilerrak, Wolfgang Schuessle, Parlamentua desegin eta hauteskundeak deituko dituela iragarri du, Joerg Haiderren FPOE Alderdi Liberaleko Susanne Riess Passer kantzilerrordeak, Legebiltzarreko bozeramaileak eta bi ministrok haien karguak utzi ondoren.

Schuesselen Austriako Alderdi Popularrak (OEPV) koalizio gobernua du Alderdi Liberalekin. Liberalek ez dute zergen inguruan adostasunik lortu eta alderdia bi zatitan banatu duen barne krisia eragin dute.

Legebiltzarra desegitea irailaren 19an proposatuko da, ahalik eta azkarren hauteskun-

deak egiteko. Hauteskundeak udazken honetan burutzea nahi dute, berezko data baino urtebete lehenago.

Neurri ekonomikoak eztabaidagai

Kargu uzteak, alderdiaren barnean jasadako krisiaren ondorioz etorri dira. Alderdi Liberalek igandean eginiko bileran gobernuaren proposamena ez onartzea erabaki zuten, neurri ekonomikoei dagokionez. Ondorioz, alderdia bitan banatua geratu zen: Joerg Haider ultraeskuindarraren aldekoak batetik, eta Riess-Passeren aldekoak, moderatuagoak, bestetik.

Gobernukideen dimisioaren ondoren, Schuessel kantzilerrak bi alternatiba zituen: Lege-

biltzarra desegin eta hauteskundeak deitu, edo gobernukide berriak onartu. Azkenean, hauteskundeak egitea erabaki zuen.

Herber Scheibner Alderdi Liberaleko (FPOE) behin-behineko presidente eta Defentsa ministroarekin bildu zen kantzilerra atzo goizean, koalizioaren etorkizunari buruz mintzatzeko. Arratsaldean, Thomas Klestil presidente federalarekin izan zen.

Joerg Haider ultraeskuindarrak 2000. urtean alderdiko buru izateari utzi bazion ere, oraindik eragin handia du alderdi barnean.

Alderdi Liberaleko kideak urriaren 20an bilduko dira buru berriak hautatzeko.



ROBERT JAEGER / EPA

Schuessel kantzilerrak prentsaurrekoan jakinarazi zuen erabakia.